



অবিলম্বে প্রকাশের উদ্দেশ্যে: 1/2/2022

গভর্নর ক্যাথি হোকল

**ভোক্তা পণ্যে থাকা অগ্নি-প্রতিরোধী রাসায়নিক পদার্থগুলোর ক্ষতি থেকে নিউ ইয়র্কবাসীদের সুরক্ষার জন্য গভর্নর হোকলের আইন স্বাক্ষর**

**এই আইন (S.4630-B/A.5418-B) ঘরোয়া আসবাবপত্র, ম্যাট্রেস, ও বৈদ্যুতিক এনক্লোজার ইত্যাদিতে রাসায়নিক পদার্থের ব্যবহার নিয়ন্ত্রণ করবে**

গভর্নর ক্যাথি হোকল S.4630-B/A.5418-B আইন স্বাক্ষরের কথা ঘোষণা করেছেন যা স্নায়বিক আঘাত, হরমোনের বিঘ্ন ঘটনা, ও ক্যান্সারের ঝুঁকি উল্লেখযোগ্য হারে বাড়িয়ে দেয়ার সাথে সম্পৃক্ত বলে জানা গেছে এমন কিছু নির্দিষ্ট অগ্নি-প্রতিরোধী বিপজ্জনক রাসায়নিক পদার্থ ব্যবহৃত হওয়া আসবাবপত্র, ম্যাট্রেস, ও ইলেক্ট্রনিক ডিসপ্লে বিক্রিকে নিষিদ্ধ করবে।

"অনেক বেশি সংখ্যক ঘরোয়া জিনিসে এমন বিষাক্ত রাসায়নিক পদার্থ থাকে যা আমাদের শিশুদের এবং প্রথম সাড়াদানকারীদের গুরুতর অসুস্থতার ঝুঁকিতে ফেলে দেয়," **বলেছেন গভর্নর হোকল।** "আমাদের ক্রয় করা আসবাবপত্র, ম্যাট্রেস, ও ইলেক্ট্রনিক সামগ্রীগুলো নিরাপদ হওয়া উচিত এবং এই আইন স্বাক্ষরের মধ্য দিয়ে, আমরা এখন এটা নিশ্চিত করতে পারবো যে নিউ ইয়র্কে এসব পণ্য বিক্রি করা হলে, সেগুলো বিপজ্জনক উপাদানমুক্ত হবে।"

এই বিল ঘরোয়া আসবাবপত্র, ম্যাট্রেস, ও বৈদ্যুতিক এনক্লোজার ইত্যাদিতে রাসায়নিক পদার্থের ব্যবহার নিয়ন্ত্রণ করবে। এটি হ্যালোজিনেটেড রাসায়নিক পদার্থ, অর্গানোফসফরাস রাসায়নিক পদার্থ, ও অর্গানোহাইড্রোজেন রাসায়নিক পদার্থ এর মতো পরিভাষাগুলো সংজ্ঞায়িত করতে সাহায্য করে। এটি অগ্নি-প্রতিরোধী রাসায়নিক পদার্থ রয়েছে বলে শনাক্ত হওয়া যেকোনো আসবাবপত্র বিক্রি নিষিদ্ধ করে। এছাড়া এটি বার বার লণ্ঘনের ক্ষেত্রে দৈনিক সর্বোচ্চ 2,500 ডলার পর্যন্ত জরিমানার বিধানও রেখেছে।

অগ্নি-প্রতিরোধী পদার্থ হলো এক শ্রেণীর রাসায়নিক পদার্থ যা আগুন প্রতিরোধে সাহায্য করার উদ্দেশ্যে আসবাবপত্র, ইলেক্ট্রনিক্স, ও নির্মাণ সামগ্রীতে যোগ করা হয়ে থাকে। তবে, বহু অগ্নি-প্রতিরোধী পদার্থের সঙ্গে প্রাণী ও মানুষের স্বাস্থ্যের ক্ষতিকর প্রভাবের সংশ্লিষ্টতা রয়েছে, যার মধ্যে রোগ প্রতিরোধ ব্যবস্থার উপর নেতিবাচক প্রভাব, অনুর্বরতা, ক্যান্সার, ও দ্রুণ ও শিশুর বিকাশের উপর ক্ষতিকর প্রভাব ইত্যাদি অন্তর্ভুক্ত রয়েছে। শিশুদের জন্য অগ্নি-প্রতিরোধী পদার্থে থাকা বিপজ্জনক রাসায়নিক পদার্থগুলোর সংস্পর্শে আসার অনেক বেশি আশংকা থাকে। অগ্নি-প্রতিরোধী রাসায়নিক পদার্থগুলো ভেঙ্গে যাওয়া কঠিন, যার অর্থ হলো সেগুলো যেকোনো পরিবেশে বা ঘরের ভেতরে কয়েক বছর পর্যন্ত থেকে যেতে পারে। শনাক্তযোগ্য বিপজ্জনক

অগ্নি-প্রতিরোধী রাসায়নিক পদার্থ বিদ্যমান থাকা নির্দিষ্ট কিছু পণ্য বিক্রির উপর বিধিনিষেধ বাস্তবায়ন করার মাধ্যমে নিউ ইয়র্কবাসীদের, এবং তাদের শিশুদের বিপজ্জনক বিষাক্ত পদার্থের সংস্পর্শ না আসা নিশ্চিত করা যাবে। এছাড়াও, আগুন প্রতিরোধ বা দমনের ক্ষেত্রে এসব বিষাক্ত রাসায়নিক আদৌ কোনো ভূমিকা পালন করলেও, সেটা সীমিত পর্যায়ে, কারণ অন্যান্য যেসব স্টেট আইন প্রণয়ন করেছে তারা পণ্য থেকে এসব রাসায়নিক পদার্থ সরিয়ে দেয়ার ফলে অপেক্ষাকৃত বেশি সংখ্যক আগুন লাগা অথবা নতুন কোনো নিরাপত্তাজনিত উদ্বেগের সম্মুখীন হয়নি।

**সিনেটর টড কামিনস্কি বলেন,** "ক্যান্সার-সৃষ্টিকারী রাসায়নিক পদার্থগুলো থেকে আমাদের শিশুদের ও দমকল কর্মীদের স্বাস্থ্য সুরক্ষিত রাখার চেয়ে বেশি গুরুত্বপূর্ণ কিছু নেই। আমাদের বাড়ির নিত্যদিনের ব্যবহার্য জিনিস, যেমন আসবাবপত্র ও ম্যাট্রেস ইত্যাদি থেকে এসব বিষাক্ত পদার্থ নিষিদ্ধ করার মাধ্যমে, আমরা আমাদের কমিউনিটিকে নিরাপদ রাখার ক্ষেত্রে একটি বৃহৎ পদক্ষেপ গ্রহণ করতে যাচ্ছি। কর্পোরেশনগুলোর মুনাফার তুলনায় আমাদের পরিবারগুলো এবং প্রথম সাড়াদানকারীদের জীবনকে অগ্রাধিকার দেয়ার লড়াইয়ে নেতৃত্ব দিতে পেরে আমি গর্বিত ছিলাম — এবং এই আইন ঠিক সে কাজটিই করবে। এই গুরুত্বপূর্ণ বিলটিকে আইনে পরিণত করতে স্বাক্ষর করায় গভর্নর হোকলকে ধন্যবাদ।"

**অ্যাসেম্বলি সদস্য স্টিভ ইংলেব্রাইট বলেন,** "এই নতুন আইন প্রথম সাড়াদানকারীদেরকে ক্ষতিকর রাসায়নিক পদার্থের অপ্রয়োজনীয় সংস্পর্শ থেকে সুরক্ষিত থাকতে সাহায্য করবে। শ্বাসের সাথে ধোঁয়া টেনে নেয়া অগ্নি-সংক্রান্ত মৃত্যুর শীর্ষ কারণ। দুর্ভাগ্যবশত, অগ্নি-প্রতিরোধী পদার্থগুলো হাইড্রোজেন সায়ানাইডের মতো বিষাক্ত রাসায়নিক উৎপন্ন করে যা শ্বাসের সাথে টেনে নিলে ক্ষতির কারণ হয়। এটি দমকল কর্মীদের জন্য বিশেষভাবে বিপজ্জনক। সেইসাথে, ম্যাট্রেস, আসবাবপত্র ও বৈদ্যুতিক সরঞ্জামের কেসিং-এ অগ্নি-প্রতিরোধী পদার্থের উপস্থিতি আমাদের পরিবারগুলোকে বিপদগ্রস্ত করে কারণ এসব রাসায়নিক পদার্থ পণ্যগুলো থেকে বের হয়ে আমাদের ঘরের ধূলাবালির সাথে মিশে যায়। আমরা শ্বাস-প্রশ্বাসের সাথে এসব রাসায়নিক পদার্থ গ্রহণ করে ফেলি এবং আমাদের শিশুরা মেঝেতে খেলার সময় সেগুলো গিলে ফেলে। এসব রাসায়নিক পদার্থ ক্যান্সার, অনুর্বরতা, এবং আমাদের রোগ প্রতিরোধ ব্যবস্থার জন্য বিপজ্জনক হওয়া সহ স্বাস্থ্যের উপর বিভিন্ন ক্ষতিকর প্রভাব ফেলে। এই জীবন-রক্ষাকারী নতুন আইন প্রণয়নে আমার সঙ্গে ঘনিষ্ঠভাবে কাজ করার জন্য আমি গভর্নর হোকলকে ধন্যবাদ জানাতে চাই।"

###

আরো সংবাদ পাওয়া যাবে এখানে [www.governor.ny.gov](http://www.governor.ny.gov) -এ  
নিউ ইয়র্ক স্টেট | এক্সিকিউটিভ চেম্বার | [press.office@exec.ny.gov](mailto:press.office@exec.ny.gov) | 518.474.8418

[আনসাবক্লাইব করুন](#)